

REGIONAL NEWS

HEADLINES

1. Rawthing tam avanga sazu puangin an thlawhhma a tihchhiatsak kuthnathawktu chhungkaw 4,756 an tling tawh.
2. Mizoram sorkarin Zoram Medical College & Hospital-ah post graduate (specialist) zir phalna a dil chu National Medical Commission-in subject 5-ah seat 10 a phalsak.
3. Kumin thla 9 leh ni 10 chhung khan Mizoramah ngawr natna (TB) vei mi 1,870 hmuhchhuah an ni a, an zing mi 121-in an thihpui.
4. Union Science & Technology Minister, Dr. Jitendra Singh-a'n India-in a vawi khat nan antibiotic, Nafithromycin a siam chhuak tih a sawi.

<><><>

RODENTS

Rawthing tam avanga sazu puangin an thlawhhma a tihchhiatsak kuthnathawktu chhungkaw 4,756 an tling tawh.

Agriculture & Farmers' Welfare hotute sawi danin 'Thingtam' ti a vuah, rawthing tam avanga chhungkaw 4,756-te hi Mizoram district 11 a khaw 150 a chengte an ni a. Khaw 150 a thlawhhma lakna ram zau zawng hi hectare 6,938 point 154 zet a tling a. Sazu puangin a tihchhiat thlawhhma zau zawng hi hectare 1,988 chuang a tling tawh a ni. Sazu tur kg. 186 chuang department-in an sem chhuak tawh a. Sum indaih lohna avang leh fur a nat em avanga tlawh pawh theih loh khua, sazu tur sem theih lohna a awm nual bawk. Agriculture & Farmers' Welfare department hotute chuan loh theih loh avanga sazu hi tura hrai a ngaih thu an sawi a. Chu tih rualin a huhova sazu hrai kalpui a tha ber tih sawiin, fimkhur erawh a ngai hle an ti a, Sazu thite hi kutkawr bun chungah chhar khawma phum tur a ni an ti bawk.

Rawthing tam avanga kuthnathawktute tawrhna leh hloh hi state specific disaster a puang turin Disaster Management & Rehabilitation-ah ngen mek a ni a. Puan a nih chuan rawthing tamin a hrin sazu puang avanga an buh leh bal leh thlai tam tak chantute hi zangnadawmna pek theih a beisei-awm thu Agriculture & Farmers' Welfare department hotute chuan an sawi a ni.

<><><>

TRUCKERS

Mizoram ei leh bar lakluhna kawngpui pawimawh Kawnpui leh Sairang inkar kawng chhia siamtha turin tun thla ni 25 hmaa hmalakna lian tham a awm loh chuan NHIDCL chungah engpawh thleng se sawi theih an nei lo tih truck neitu leh khalhtute'n an sawi.

Mizoram Truck Owners' Association (MTOA) leh Mizoram Truck Drivers' Association (MTDA) chuan nimin khan thuchhuah intawm siamin, Kawnpui leh Sairang inkar NHIDCL enkawl chu hun eng emaw chen tlan hleih theih loh khawpin a chhia an ti a. Ruah a tlak tawh loh hnuah pawh tih tak taka thawh a awm lo ni a an hriat thu leh an truck te a tlu-in a chhiat phah nasa tawh hle tih an sawi a. An pawl 2 member te tawrhna leh thinurna chu a sosang tawh hle tih sawiin, tun thla ni 25 theng an ngaihchan hnuah hmalakna lian tham an hmuh loh chuan he lai kawng

enkawltu NHIDCL chungah engpawh thleng se sawi theih an nei lo tih an sawi a ni.

Hemi chungchanga Akashvani Aizawl zawhna chhangin, MTOA general secretary Pu Dina Tlau chuan Kawnpui atanga Sairang inkar kawngpui chu hun engemawchen namen lovin a chhe tawh a, sorkar leh he kawngpui enkawltu NHIDCL pawh an dawr fo a, an siam dawn tiin kum a liam leh thin a, tun hi an thleng ta tih a sawi a ni.

Hetihlai hian MNF thalaite pawhin thuchhuah siamin, Mamit leh a chhehvel kawng chhiate chu October ni 16 khan a hmun ngeiah kalin, sawrkar hmalakna te an zirchiang a. Kawng chhiate lutuk avang leh sawrkarin a hlamchhiah rei lutuk avanga All NGO Mamit leh Commercial Vehicle Association Mamit hruaituten tiam chin awm lova eng lirthei mah kal tlang theih lo tura an dan chah chu pawmawm an tih thu sawiin, kawng chhia avang hian Mamit district ah thla 3 chuang Petrol leh Diesel phurh luh theih a ni tawh lo an ti a, Silsury-a Election Observer kal tur te pawh kawng chhia avanga helicopter hiala phurh an ngai chuan Election senso nasa takin a tih san phah dawn tih sawiin, ZPM sawrkarin inkalpawhna kawngpui a ngaihthah vanga harsatna thleng te chu MNF Thalaite chuan pawh an ti hle tih an sawi a ni.

<><><>

DAMPA BYE-POLL

Dampa assembly bial hun laklawha inthlanna chu PC party-in an chuh ve dawn a, Thawhlejni hian an candidate turin a hming a pelut ang.

People's Conference (PC) party president Pu Vanlalruata'n Akashvani Aizawl a hrilh danin Dampa assembly bial bye-election hi an party chuan chuh an tum a. An candidate turin Thawhlejni khian he inthlanna a returning officer hnenah a nomination a theh lut dawn a ni. PC Party-in an chuh ve dawn takah chuan Dampa bial bye-election chuhtu hi mi 5 an awm dawn ta a. Bhartiya Janata Party (BJP), Congress, MNF leh rorellai ZPM-te chuan an candidate tur an puan tawh bakah an candidate-te hian chuh turin an hming an pelut vek tawh a. He tih lai hian independent a ding tur an awm awm thawm hriat a ni lo.

BJP chuan kum 2023 a he lai biala Congress candidate, tunhnai a an party zawmtu Pu Lalhmingthanga an vawrh a, Congress-in Minister hlui Pu John Rotluangliana an candidate a. MNF-in an party senior vice president ,Minister hlui ni bawk Dr. R. Lalthangliana dintirin ZPM atangin kum 2023 inthlanna tling zo tawh lo Pu Vanlalsailova an din nawn tir leh bawk a. Candidate leh party hrang hrangte hian vote zawn beihpui an thlak mek a ni.

Dampa assembly bial bye-election neih a tul chhan hi July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.

<><><>

ZMC&H

Mizoram sorkarin Zoram Medical College & Hospital-ah post graduate (specialist) zir phalna a dil chu National Medical Commission-in subject 5-ah seat 10 a phalsak.

Akashvani Aizawl zawhna chhangin, ZMC&H Director Dr. Zoramthara Zadeng chuan ZMC&H-a specialist zir theih turte hi subject 5- Paediatrics (MD), General Surgery (MS), General Medicine (MD), Obstetrics & Gynaecology (MS) leh Anaesthesiology (MD)-ah seat 2 theuh a ni tih

sawiin, National eligibility cum entrance test (NEET) PG Entrance exam result a zirin ZMC&H atanga PG zir tum ti tha zualte'n remchang an nei tha dawn a ti a. October atanga December thla chung hian NEET PG counselling a awm mek tih sawiin, chuta tling te chuan an thlan kim hunah ZMC&H a post graduate zirlai hmasa berte chuan nakkum 2026 January thla atang khian an zawm tan theih a rin thu a sawi a ni. Health & Family Welfare Pi Lalrinpuii pawhin an dil anga Zoram Medical College & Hospital-ah Post Graduate zirna, seat 10 phalsak an ni chu lawmawm a tih thu a Facebook account kaltlangin a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

TB

Kumin January thla atanga October ni 10 thleng khan Mizoramah ngawr natna (TB) vei mi 1,870 hmuhchhuah an ni a, an zing mi 121-in an thihpui.

National Health Mission Mizoram hnuai National TB Elimination Programme in an chhinchhiah danin, kumin chungin TB rinhlelh mi 97, 647 endik zinga mi 1,870 in TB an kai tih hmuhchhuah a ni a, TB kai te hi kum 14 chunglam mi 1,761 leh kum 14 hnuai lam mi 109 te an ni a, mipa 1,126 leh hmeichhia 744 te an ni.

Kumin chungin mi 121-in TB an thihpui tawh a, TB kai zaa 82 te chu enkawl dam an ni thung a, mi 121 te chuan TB natna khirh chi, Multidrug-resistant TB (MDR-TB) an kai tih hmuhchhuah niin, TB HIV hri kai zinga TB natna vei kawp mi 211 hmuhchhuah an ni bawk.

<><><>

1ST INDIGENOUS ANTIBIOTIC

Union Science & Technology Minister, Dr. Jitendra Singh-a'n India-in a vawi khat nan antibiotic Nafithromycin a siam chhuak tih sawiin hei hi damdawi lam leh biotechnology sector-a intodelhna tura mel lung pawimawh tak a ni, a ti a. Ramchung mithiamte Antibiotic thar siamchhuah chu thawkna lam harsatna neite tan bakah cancer veite leh zunthlum hniam tha theilo-te tan a tangkai hle dawn a ni, a ti bawk.

He thu hi nimin New Delhi-a ni 3 awn tur medical workshop a hawnaah Dr. Singh-a hian a sawi a, gene therapy hmanga Hemophilia enkawl enchhinna pawh hlawhtling taka neih a nih thu sawiin enchhinna hi Vellore-a Christian Medical College-ah neih a ni, a ti a, heta an thil hmuhchhuah hi New England Journal of Medicine-ah tarlan anih thu a sawi bawk.

<><><>

NAGA MERGER

Nagaland-a political party 2 - Nationalist Democratic Progressive Party (NDPP) leh Naga People's Front te chuan in chhunfinin, tualto party 1, Naga People's Front (NPF) hnuaih an thawk dun dawn a, NPF Legislature Party hruaitu atan Chief Minister Neiphiu Rio-a an thlang nghal bawk. Ti hian member 60 awmna, Nagaland Legislative Assembly-ah NPF hian member 34 a nei ta a ni.

Party pakhata in chhunfin tura thu tlukna hi nimin Kohima-a NDPP General Convention vawi 6-naah siam a ni a, in chhunfinna tur resolution hi state Minister, KG Kenye-a'n pu lutin party pakhat hnuaih thawh dunna chu politics-a Naga mipuite tih nghehna tur niin a sawi a ni.

<><><>